



## DISCURSU DE MOCEDÁ D'IZQUIERDA ASTURIANA NEL 8 SETIEMBRE DE 2006

Mui bones tardes a tola militancia d'Asturianistes, Izquierda Asturiana y Mocedá d'Izquierda Asturiana, xente simpatizante, collacies, collacios. Nesti día de conceyu y folixa, de proyectu y xermandía, ye un arguyu pa lo más mozo d'Izquierda Asturiana, MIAS, davos un saludu y tener esta oportunidá de facevos llegar les nuses reflexones.

Depués d'un añu qu'en MIAS tamos considerando fundacional por ser el que mos dio la forma y l'aniciu definitivu, les persones que tamos nesta organización nun podemos facer otro que celebralo y deseyar qu'esta tendencia de medría en militancia, idees y capacidá organizativa permaneza, como reflexu de lo que tamién ta significando un claru avance del partíu, de la casa común. La nuesa presencia en medios de comunicación de tol país pasó nesti tiempu de ser dafechu nula, a una constante a lo menos selmanal, que llevó la nuesa voz ellí onde hasta entós paecía imposible. Materialmente, tamién foron meses de reblagos, de trabayu que poco a poco foi trabando na posibilidá d'asistir a toles cites de reivindicación que dende la izquierda y l'asturianismu tuvieron sitiu nel calendariu 2005-2006. Abriemos les nuses canales propies d'información y propaganda, aumentemos el contactu con otres organizaciones afines, ayudemos toles vegaes que pudiemos al aparatu xeneral del partíu, y garremos, a la fin y por derechu, un sitiu nos movimientos sociales que tán lluchando permanentemente n'Asturies y por Asturies.

Parez el momentu más afayadizu p'agradece-y a la Dirección Nacional d'IAS, y a tola militancia del partíu, l'apoyu formal y moral que vienen dando a esti proyectu de mocedá tan vieyu pero, al empar, de realización tan nueva, nes selmanes de grandes cambios que mos conducen hasta güei. Mocedá d'Izquierda Asturiana, anguaño dotada d'una Dirección Nacional propia y organizada nes sos Xuntes Permanentes, fai, dende va menos d'un añu p'acá, un trabayu continuu de fortalecimientu propiu en dos planos, l'organizativu y l'ideolóxicu, mentanto s'atiende con especial procuru a les estratexes qu'amás de cualitativamente fainmos crecer cuantitativamente. Col trabayu de toes y toos, y selmana a selmana, esta casa va siendo mayor y más prestosa, un llugar d'aición eficaz y de resistencia pol patrimoniu cultural, identitariu y llingüísticu d'Asturies, pola caltenencia y cuidáu de la naturaleza y contra les inxusticies sociales, averando al traviés d'un trabayu políticu por y pa la mocedá, el deseyu d'un mundu meyor pa una sociedá que queremos más despierta y concienciada, soberana del so destín.

Persabemos que'l nuesu papel dientro de la maquinaria d'IAS ye fundamental y, poro, asumimos les nueses responsabilidaes permaneciendo sollertes a les necesidaes xenerales de cara a poder sumar a los nuesos esfuerzos individuales como militantes, los valores añedíos que da MIAS en conxuntu. Ye por eso que del mesmu mou, tenemos qu'agradecer nesti momentu al partíu, que mos dea bones cantidaes d'eso que tanto necesitamos: experiencia y aliendu.

Amás d'esta rellación paterno-filial que pasiamos pel mundu con tantu arguyu y convencimientu, güei ye día de celebrar otros vínculos. Y ye que la mocedá que nós representamos aplaude bien fuerte que la xente d'Asturianistes por Nava abra los sos brazos a un proyectu ambiciosu y ampliu, que naz cola vocación de trespasar les barreres del tediosu ámbitu asturianista al que tábemos avezándonos. Celebramos esta xuntanza de xente que coincide nesti llugar y momentu (y aguardamos que per munchos llugares y pa tola vida) col enfotu de trabayar nuna mesma estaya. Toles muyeres y homes que facemos de Mocedá d'Izquierda Asturiana l'ámbitu mozu d'IAS, queremos que sepáis que tenemos la firme intención -y la conocencia de la responsabilidá qu'ello conlléva- de ser la mocedá, tamién, de tolos mozos que dende esti conceyu quieran facer frente pol nacionalismu asturianu más alternativu, el de la xusticia social y la solidariedá, el del ecoloxismu. Hai un llugar en MIAS pa les navetes y los navetos xóvenes, y dende yá, tamos naguando pola so compañía.

Resumimos el sentir d'esti día na necesidá de trabayar a común cola xente que daveres quier cambiar Asturias y el mundu, cola xente más positivo y activo del nuesu país, con xente como vós y como nós que nun tien complexos en sentase y falar y poner los pegollos pa un futuru meyor y cercanu, y en celebrar, cuando hai motivos como los hai güei, qu'hai espaciu pal alcuentru y la política más ilusionante.

Tenemos sueños por algamar, tenemos l'enfotu y les ganés de seguir avanzando. Equí y güei entama'l camín que dende va tiempu tábemos queriendo garrar, el que mos envereda a esos sueños que tolos díes en MIAS reciclamos en forma d'oxetivos políticos y d'aición.

**¡PUXA MIAS! ¡PUXA ASTURIES LLIBRE!**

Munches gracias.

En Nava, Asturias, a 8 díes andaos de setiembre de 2006.  
MOCEDÁ D'IZQUIERDA ASTURIANA.